

Iroun Beretitenti
Thomas S. Monson



Riiki bwa te Ota

Ereke au tai ni irii katei ni bukamarau aika mwaiti ake a karaoaki n irekereke ma katabuan te tembora. I bane n tangiri ni kabane, n raonaki ma teuana ae I a bon tibwa iria n aenako i Phoenix, Arizona, USA, n Nobembwa ae nako.

Kairake irouwia aika Itiaki ni Boong aika Kaitira ake a iri katei ni bukamaru a kaoti aia burokuraem aika kamiumi, ma ni kauringaaba. Te ririki ae nako i Phoenix, imwaain teutana te katabu, I tuangiia taan ira te waaki, "Kam riki bwa natin te ota."

I tangiriia kairake ni kabane n te Ekaretia bwa a na ataia bwa a riki bwa natin te ota. N aron anne, iai mwikoaoia n riki "bwa ootan te aonaaba" (I-Biribi 2:15). Iai aia beku n tibwa koauan te euangkerio. Iai nakoia n tei bwa te kantaninga ibukin te tembora, n tei ibukin otan te euangkerio nakon rikiraken rotongitongin te aonaaba. Iai aia mwakuri ni kateimatoa ni kauramwaaka ao ni kaota-mwaaka otaia.

N te aro bwa ti aonga n riki bwa "aia tia kairiri aomata aika onimaki" (1 Timoteo 4:12), ngaira i bon iroura ti riai n onimaki. Ti riai ni karikirakea te onimaki ae riai bwa e na teimatoa maiun tamneira ao ni katauraoa te ota ibukiia tabeman. Ti riai ni kawakina ara onimaki ni karokoa ae riki bwa oin boutokaan maiura.

Ibuakon kawai aika korakora ni karekea ao ni kawakina te onimaki are ti kainnanoia n te bong aei bon warekan ao kamatebwaiian booki aika tabu ao n tataro

n taainako ao n teimatoa. Nakoia kairake n te Ekaretia, I kangai, ngkana kam tuai ni karaoia, karikirakea te katei ngkai ni kamatebwai booki aika tabu ao tataro. N akean mwakuri aika uoua aika kakawaki aikai, ana mwakuri te aonaaba ao n tabetai baika koaua aika bubuaka n te maiu a kona ni kamemeerea ke ni kabua otam.

Ririki aika tebwitabun a bon aki bebete. Bon ririki aika kakawaki ngkana Tatan e na kariiri ngkami ao ni karaoa ana kabanea ni konaa ni kamwaneko man te kawai are e na kairiko n oki nakon mweengam are i karawa. Ma ngkai ko wareware ao n tataro ao ngkai ko beku ao n ongote-eka, ko na kamatataaki riki n "te ota are e oota n te rooto-ngitong (taraaD&C 6:21), ara Katooto ao korakorara—bon te Uea Iesu Kristo. Bon Ngaia te Ota ti na tauii i eta ara taura ni kanakoa te rotongitong (taraa 3 Nibwaai 18:24).

Ma te kokoaua ae korakora ibukin te Tia Kamaiu ao Ana euangkerio are e a tia ni kaokaki, e na reke am tai aika akea tiatianakiia ni kaota te ota. A katobibiko ni katoa bong, ni bwaai nako ake ko karekei i bon iroum. Ngkai ko ira ana katoto te Tia Kamaiu, e na reke am tai n riki bwa te ota, n aron are ko kona n taekinna, ni maiuia naake a mena irarikim—bwa tao ngkana kain am utu, kaain am kiraati, raom ni mwakuri, ae ko tii kinaa, ke aomata aika ko aki kinaia.

Ngkana otan te aonaaba ngkoe, aomata ake irarikim a na namakina te tamnei ae onoti ao a na kan irekereke ma ngkoe ao n ira am katoto.

I bubutia kaaro ao taan kairiiri ibukiia ara kairake ni buokiia n tei ni matoatoa ibukin te koaua ao te raoiroi. Buokiia ni karikirakea aia taratara n reiakinaki, ibukin te atatai, ao ibukin te mwakuri n ibuobuoki n abanuean te Atua. Karikirakea inanoia te korakora n totokoa ana kariiri te aonaaba. Anganiia te kantanninga n nakonako inanon te tamaroa ao te onimaki, bwa a na tataromwaaka, ao n taraa karawa bwa aaia ae teimatoa.

Nakoia ara rororrikirake, I kangai, e tangirii ngkami Tamara are i Karawa. Ko bia namakina naba aia tangira taan kairiiri n te Ekaretia ibukim. Ko bia karekea te nano ni kan beku ibukin Tamam are i Karawa ao Natina. Ao ko bia nakonako n taainako n te koaua ao n tei bwa te ota ibuakoia natin te Atua.

REIREI MAN TE RONGORONGO AEI

Iangoia ni maroro ma naake ko reireiniia bwa tera ae nanonaki n ribwa bwa “[natin] te ota.” Tera te mwioko ae e uoti? Ko kona ni maroroakin taai ngkana otaia e a tia n riki n otamwaaka ao tera ae e kaotamwaaka. Iangoia n titirakinia n iangoa te aomata ae onoti, n aron te kairake, te tia ibuobuoki ni mwakuri, ke kaain te utu, are e bae ni kainnanoa te ota. Ngkanne kam kona n tataro ni ikotaki iaon aron tibwuan te ota ma te aomata anne.

KAIRAKE

Biikan ibukin te Ota

Ereirei Beretitenti Monson bwa kairake n te Ekaretia “iai weteaia n tei bwa te kantanninga ibukin te tembora, n tibwa otan te euangkerio nakon te aonaaba ae rikirake n rotongitong.” E anga tabeua kawai ake ko kona iai ni karaoa aio:

Tibwa te euangkerio
Kakoaua
Karikirakea te onimaki
Riiki bwa te ota nakoia tabeman
Kawakina am koaua ni karokoa are e riki
bwa boutokaan aan maium
Wareka ao kamatebwai booki aika tabu
Tataro ni katoa tai ao n teimatoa
Beku
Ongeaba

Iangoia n taubwia arom man 1(inano ke aki tamaroa) nakon 5 (rangin tamaroa) inanon aono aikai n tatabeua. Ibukin aono ma bwiia aika rinano, ko kona ni kamatebwai taobiki aikai ni booki aika tabu ke n ukoukori nako iaon LDS.org. Imwiin tiam ni kamatebwai an taobiki aikai, ko kona n iangoi kawai ake ko kona iai ni kakorakorai aaro aikai ao ni katei kouru ake ko na karaoi.

ATAEI

Kaota Am Taura

Ngkai natin te Atua ngkoe, boni ngkoe natin te ota. Ko kona ni karekea riki te ota man iriran ara Tia Kamaiu, lesu Kristo. lesu Kristo ao te Tama are i Karawa a tangirii ngkami ao a tangiriko bwa ko na riki bwa te ota nakoia tabeman ao ni kairia nakon Kristo. Ko kona n ota tii man iriiran taian tua, n aron te tataro ao warekan booki aika tabu. Korea tamnein taian itoi iaon te mwakoro ni beeба ao korei taekia ma iango bwa ko na kanga ni kaotamwaakako ibukiia tabeman bwa te katoto ibukin lesu Kristo (n aron te katoto, “te nako n taromauri,” ke “buokakiia au utu”).



Anuan Iesu Kristo aika Tabu— Nimamannei ao Nanorinano

Tataromwaaka ni kamatebwiaia te bwai n reirei aei ao n ukoukoria n ataia bwa tera ae ko na tibwauaia. E kanga am atatai ni maiun ao ana mwakuri te Tia Kamaiu ni karikirakea am onimaki Irouna ao ni kakabwaiaia naake ko tararuuaia rinanon te reirei ni kakawari? Ibukin rongorongona riki tabeua, nakon reliefsociety.lds.org.

Aio mwakoron Rongorongo ni Kakawari n te Reirei are e kaota iai anuan te Tia Kamaiu.

Etaku Iesu, “Ane e kakannato riki i buakomi, ao ke e mena n ai aron ane te tei riki; ao ane te mataniwi, n ai aron te tabonibai. Ba e anga ae kakannato riki, ane rariki-riki n amarake, ke ane e bekutata? tiaki are rarikiriki n amarake? ao ngai I mena i buakomi n ai aron te tia bekutata” (Ruka 22:26–27).

“Te Tia Kamaiu bon ara katoto ae rietata man mwaakan te nanorinano ao te taotaonakinnano. N rikina ni koaua, Ana taotaonakinnano n Ana kantaninga nakon te Tama e kakoroa nanon te bwai ae kakannato, ao te kabanea ni korakora naba, n te bwai ae riki n rongorongo ni kabane. Tao tabeua taeka aika moan te tabu ni booki aika tabu a bebete, ‘Akea au taeka, ma e na tauaki am taeka’ (Ruka 22:42).¹

Ngkai ana reirei Iesu Kristo ngaira, ti ukoukoria n taainako n riki n ai Arona. “Te nimamannei e kakawaki ibukira ni karikiira riki n ai aron Kristo, “ e taku Unimwaane Ulisses Soares man te Itingaun. N akean aei ti na bon aki kona ni karikirakei tabeua aaro aika tamaroa

aika kakaawaki. Te riki n nimamannei tiaki nanona bwa te mamaara, ma bon nanona karaoan te aroaro ma te tamaroa ao te akoi, kaotan te korakora, te rau, nakoraooin bonganam i bon iroum, ao am taubaang i bon iroum.”² Ngkai ti mwakuri ni karikirakea te katei aei, ti na kunea bwa “ara taotaonakinnano ma te nanorinano n ara kantninga nakon te Tama e anganiira mwaakan te Atua—mwaakan te nanorinano. Bon te mwaaka ni kaitarai kangaanga n te maiu, mwaakan te rau, mwaakan te kantninga, mwaakan te nano ae kaonaki ma te tangira ibukin ao ana kakoaua te Tia Kamaiu Iesu Kristo, mwaakan te kaboomwi.”³

Rakan riki Booki aika Tabu

Mataio 26:39; Ioane 5:30;
Motiaeia 3:19; Ereman 3:35

Man Koroboki aika Tabu

Teuana ana kabanea ni kakukurei ao ni mwaakaroiro n ana mwakuri Kristo bon ngke E teboki waeia Ana reirei. “E teirake man te amarake, ao e kaki kunnikaina; ao e ana te kaoa, ao e kabaea nukana. Ao rimwi e kabaroa te ran i nanon te betin,

ao e teboki waeia ana reirei, ao e kaoi n te kaoa are e kabaeaki nukana iai” (Ioane 13:4–5).

Ngkai e kabwarabwara te otenanti te Tia Kamaiu, ana reirei a bon rootaki n te aro are aia Tia Kamaiu ao aia Tia Reirei e katorobubua imataia ao ni karaoa te mwakuri ni ibuobuoki ma te nimamannei. Iesu e kamataata te reirei ae E tangiria bwa a na reia-kinna ao ngaira ni kabane:

“Ao ngkai I teboki waemi, ngai ae ami Uea ao ami tia Reirei, ao e riai bwa kam na teboteboki naba waemi.

“Bwa I anganikingkami te bwai ni kakairi, bwa kam na katorongae ae I karaoia nakoimi.” (Ioane 13:14–15).

BWAII AIKA A NA TARAAKI

- Richard C. Edgley, “The Empowerment of Humility,” *Liahona*, Nobembwa. 2003, 99.
- Ulisses Soares, “Be Meek and Lowly of Heart,” *Liahona*, Nobembwa. 2013, 9.
- Richard C. Edgley, “The Empowerment of Humility,” 99.

Iangoa Aio

E kanga karekean te nanorinano ni buokiira n tangira n aron ae e karaoia te tia Kamaiu?